



**Jordan Henderson
Chelsea nung denogo**



**TN CM Vijay-i sen cr 113 alang health
infrastructure tem semzüksü**

MP Supongmeren-i Veterinary Education Infrastructure ajungkettsü ayongzük

Dimapur, August 4, 2026 (TYO): MP S. Supongmeren Jamir-i Mongulbarnü Parliament nung Zero Hour mapang kanga dang tongtipang onük ka benoka lemsatepogo.

MP Supongmeren-i Centre sorkar dang College of Veterinary Sciences & Animal Husbandry, Jalukie, Peren nung infrastructure aser academic facilities akangshitsü ayongzük.

Iba college ya Central Agricultural University (CAU), Imphal nung constituent college ka lir. Tanü veterinary education, animal health management aser livestock development ya kanga tongtipang kumogo anungji Minister for Fisheries, Animal Husbandry and Dairying ajanga

iba reju asoshi terenlok mapatongtem inyaktsü senotsü agütsütsüla ta Supongmeren-isa mepishia jembí.

Paisa, Veterinary Clinical Complex ka yanglutsü, Veterinary Laboratory Diagnostic (VLD) facilities ajungkettsü aser Veterinary Telemedicine and Mobile Animal Health maparen tenzüksü tebilembatem lemsatep.

Item maparen ajanga veterinary education tajungba akümtsü aser animal healthcare services tashi aittsü. Linük kübok tesem balala nungi kaketshirtem iba college nung azüngtsü aser infrastructure tajungba akümba ajanga parnok kanga ajangzüksü ta MP Supongmeren-isa Ministry ayongzükogo.

Dimapur ayongtem nungi tagitarutsü mashii agiteta magitsü

Dimapur, August 4, 2026 (TYO): Dimapur district nung temelaba melii lung tulu, lung tila, lisem aser ayong ponglang nung aliba tanga tagitsütem magitetsü tetuyuba agütsüogo.

Nagaland (Ownership and Transfer of Land and its Resources) Act 1990 aser Nagaland Minor Mineral Concession Rules, 2004 aser tanga regulatory compliances kübok permissions/ licenses mangu tashi kol tulutem amshia item tagitsütem magitetsü tenokdangba agütsür ta Dimapur district administration-i sangdong

ka nung shiogo.

Kija mesüra telok kari iba tetuyuba anema inyakba putetra tapet özüng kübok temerenshi alitsü ta Dimapur Deputy Commissioner Dr. Tinojongshi Chang-i ashi.

Iba tetuyuba akangakanga inyaktsü atema district administration, police, Geology & Mining department & Forest department ketdangsürtem, CSOs aser Village Council/ Municipal Council/ Town Council nungi teshimtet nübotem dena monitoring team ka tentetogo ta paisa ashi.

Konyak Union-i Nagaland sorkar teyari meshir

Dimapur, August 4, 2026 (TYO): Mon district nung tzünglu aser anentsüh ajanga gari lenmangtem ajanga tesentaktep nung timtem tulu ajurua lir aser civil society teloktemi lenmangtem lapoktsü meranga inyakaka anentsüh alupet alur ta Konyak Union (KU)-i metetdaksüogo.

Iba asoshi KU-i Nagaland sorkar dang Mon district nem heavy machinery, technical manpower aser tanga resources agütsütsü mepishio.

July 19 nungi Mon district kübok tesem aika nung anentsüh aluba aser ajungben tzümetsüng timtem manener aser iba ajanga lenmang aika raksaogo. Iba ajanga tesem aika nung connectivity mali kumogo aser yimtsüng aikatui mouteter, koba ajanga essential commodities,

healthcare services, emergency response maparen inyakba nung kongshir ta KU-i ashi.

Konyak civil society teloktemi timtem ajuruaka road connectivity atema meranga inyaker. CSOs ajanga JCB excavators 11, Poclain excavator ka aser dumpers 10 bendena mapa inyaker aser iba den külemi volunteers-i district administration den anentsüh yadokba aser lenmangtem lapokba nung yariteper ta parnokisa metetdaksü.

Iba tensa ka ya kanga majung anungji sendaktepa aliba department aser agency temi raksaa aliba lenmangtem nung temulung agütsütsüla aser additional machinery o technical personnel yoka inyakdaksütsüla ta Konyak Union-i sorkar dang metetdaksüogo.

Watiyongpang-Changtongya tsüingda gari tulutem noktanger

Dimapur, August 4, 2026 (TYO): Additional Deputy Commissioner, Tuli-i Watiyongpang-Changtongya tsüingda gari tulutem mesenzütsü metetdaksüogo.

July 19 nü tzümetsüng aser

anentsüh ajanga gari lenmangtem kanga mejungi raksaa aliba atema iba lemtet agi. Maneni PWD (NH-2) aser PWD (R&B), Tuli Division ajanga ashiba nung ajemdaker iba tetuyuba agütsür ta ADC Tuli-i ashi.

Alima lendong agi Mokokchung dist nung kibong 450 shi takoksa ajurua lir



Mokokchung DC Ajit Kumar Verma IAS (tiyong), Atsüingba Walling NCS (Abelen) aser NSDMA nungi ketdangsür Temsuwangshi Jamir noksa nung angur.

Mokokchung, 4th August (TYO): Mokokchung district kübok 19th July sülen tang tashi nung anentsüh agi lenmang raksar yim tonga moutetbaji - Molungkimong aser Yimjenkimong na asütsü, saka

administration-i anir concerned department aser yimden yimsüsrtemi lenmang lapoktsü kanga merangdaki ta Mokokchung Deputy Commission, Ajit Kumar Verma IAS-i pa indang office taktang nung osangbener senden ka amendang district nung atalokba tensa tia indang lemsatep.

Talisa July 19 sülen nungi Mokokchung district kübok tsünglu tanen maka aruba ajanga tzü metsüng aser anentsüh lendong agi tesem aika nung teraksa ajuruogo aser District Disaster Management Authority (DDMA) Mokokchung ketdangsürtemi 2nd August 2026 tashi nung tensa tia azüoktsü aser

asadangtsü asoshi item terasak atalokba tesemtem semdangogo aser tim mera agiyonga arudaki, ta Mokokchung DC-i metetdaksü.

Tuli nung tzü metsüng tulu ajurudang koda masüba nüburtem asoshi DDMA ajanga Relief Camp lapoka nüngdak tapu balala aonung/sangwa (24x7) tanen maka agüja aru saka tensa tia akhi ama süngjema akümba ajanga Tuli Relief Camp-ji tanü (4th August) nungi shibanga atar, ta pai ashi.

Taküm tsünglu tanen maka aruba ajanga Mokokchung district kübok kanga mejungi kongshibaji Tuli Sub-division aser Mangkolemba Sub-division na asütsü. Tzü metsüng aser anentsüh lendong balalai Tuli nung kibong 430, Mangkolemba nung kibong 8 dak kongshiba osang lir. Lenmang raksaba rongnung Mangkolemba sub-division nung teimtiba asütsü,

yim 22 nung lenmang raksar liasü saka item rongnung kanga majungbaji Molungkimong, Yimjenkimong, Waromung aser Yajang 'C' nung lir. Iba osang zülü tashi nung Molungkimong aser yimjenkimong nungbo gari lenmang melapokteti liasü. Waromung aser Yajang 'C' purbo tanga yim lenmang (alternative road) nungi gari tilatambo jajadar, ta angazüker. Tanü Mangkolemba sub-division pur iba dak sentakba nung senden ka jatepa lir, ta paisa shisem.

Tuli aser Mangkolemba Sub-division kübok tesem kar nung pipe line raksaba ajanga tzü junga manguba osang lir. Iba den ano alu/tzülu/ango tzüpu raksaba osang aika lir, tangji item osangtem tagidak lir. Yajang feeder (11 kv) raksaba agi iba temeket alirtem light junga maruba agi timtemba osang angashir.

(Maneni tapak 2 nung...)

PAC-i ministerial-level interlocutor shimtsü nenshir

Kohima, August 4, 2026 (TYO): Nagaland sorkar Political Affairs Committee (PAC) ajanga Mongulbarnü Naga yimtenren olemtep atema ministerial-level interlocutor ka shimtsü takhangba nenshiogo aser yimjung maparen atema asalentong ka renemtsü asoshi sendaktepa alirtem den jembiteptsü ta metetdaksü.

Chief Minister's Residential Office nung PAC senden ka amenba sülen Government Spokesperson aser Power and Parliamentary Affairs Minister K.G. Kenye-i iba osang lemsatep.

"PAC züngsemtem tanep 10:00 ako nung ajuruteper. Iba senden nung züngsem 28 prong aden. Onoki tesüiba sendentem nung bangzüngtem renemba aser tesüiba ita 24 tsüingda tatalokbatem meyipa reprangshi. Tensa asadangba sülen tesüiba nung noktakba ama masetshii noktaksü bangjemtep" ta Kenye-i osangbener dang ashi.

PAC-i sendaktepa alirtem den ajuruteper sensaksemba sülen Naga yimten tebilemstü angatetteptsü atema roadmap ka ama asalentong ka renemtsü ta paisa ashi.

PAC-i Centre dang ministerial-level interlocutor ka shimtsü takhangba agüshitsür ta paisa shisem.

"Onoki ministerial-level interlocutor ka shimtsü akhangtsü lemtet ya zübazüba agiba masü. Iba jenjang nung interlocutor meshimra olemtep nung adenertem temulung moulur aser asenok tebilemstütem jungjunga mashitsü ta sorkaria bilemer. Centre-i onoki akhangba onük shisadangdar ta nangzükogo" ta Kenye-i ashi.

"Iba tebilemstü khuret nung Naga public ajanga sendaktepa lir kechiyong iba ya Naga nung tarutsü atema lir. Asenok teinyaktsü aika lir aser onük ulura asünung onoki nisung shinga temulung meyirudaksünür" ta paisa metetdaksü.

"Iba tebilemstü onük nung sendaktepa alir ajaki kati ka dak tai tongloktsüba anendi aser yimten latettsüba nung ang temulung agütsüdi. Asen nübortem aser asen tarutsü tajungtiba atema temulung agütsüdi" ta Spokesperson aser Minister Kenye-isa ashi.

NSCN-IM sasep nung

"Eastern Flank" tentetba nung sorkari tenük yokdar saka kulitem mangu tashi kecha meshitetsü ta paisa shisem.

Centre aser NSCN (IM) tsüingda Framework Agreement sign süteper küm 10 abensaba aser NSCN (IM)-i Naga yimten latettsü asoshi agreement sülen anidaksü ta nenshiba ya imlaa dang liasü ta Kenye-i ashi.

Framework Agreement nung parnoki sign asü anungji parnok iba jenjang nung noktaksüba ya tim dang ta pai shisem.

Eastern Nagaland People's Organisation (ENPO)-i August 15 tashi nung legislative powers indang osang tejangja ashitsü mapang züngzüksüba atema Kenye-isa ashiba agi "tanü PAC senden nung iba onük mebenok kechiyong iba senden ya Naga yimten tebilemstü atema dang jazüka amenba liasü."

"Asenoki langka tajung ka ajangzüksü atema kishizüing nung noktaka lir. Asenoki küm aika ataa aruogo aser ajak ajangzüksüaa lemtet ka agitsü atema hopta mesüra ita ishika atatsüsa kümra, ni telok ajak dang aremzüka alitsü mepishir" ta Kenye-is ashi.

Dimapur nung Solid Waste Management Rules reprangshi



Deputy Commissioner, Dimapur, Dr. Tinojongshi Chang, NCS menden sür Special Cell aser District Level Implementation & Monitoring Committee on the Solid Waste Management (SWM) Rules, 2026 telungjem senden ka DC Dimapur office chamber nung August 4, 2026 nü mena liasü.

Dimapur, Luroi/August 04 (TYO): Special Cell aser District Level Implementation & Monitoring Committee on the Solid Waste Management (SWM) Rules, 2026 telungjem senden ka Deputy Commissioner, Dimapur indang office chamber nung August 4, 2026 nü mena district nung Solid Waste Management Rules, 2026 mapa kuma inyakba repranghia liasü.

Senden nung Deputy Commissioner, Dimapur, Dr. Tinojongshi Chang, NCS menden liasü aser ADC, Dimapur, Dr. Diana Patton-i SWM Rules, 2026 kübok nükjidong, key performance indicators (KPIs) aser mapa kuma inyaksü sentongtem indang rateta ashi.

Dr. Tinojongshi Chang-i iba senden nung jembidang iba Rules shidak amshitsü atema stakeholders department tem teka amteper inyaksü nüngdakba nenshia ashi. Pai züngsemtem dang monitoring mechanisms tashi itshitsü, department balala tsüngta amalitep tajungba akumtsü aser

jana bensaba, bendenba, belenba, processing aser scientific yimya amshia indokba dak sendakba tebilemtsü tem bentettsü ayongzüka liasü.

Committee ajanga tanaben tentetshiba Special Cell teinyaksü reprangshi aser nüburtem nem awareness agütsütsü atema tasa, Rules nung aliba ama inyaksü aser district tesem ajunga nung urban aser rural areas temürekba kumdahtsütsü indang jembia liasü.

Senden nung district action plan aser Deputy Commissioner kübok SWM atema Special Cell amenokba, Bulk Waste Generators (BWGs) jangjatetba aser züngdangba, legacy waste dumpsites bioremediation, assessment aser mapping, aser Urban Local Bodies ajanga SWM bye-laws metetdaksüba, ward aser Gram Panchayat levels nung lenmang pezü nung source segregation asüba, waste processing systems tashi itshiba, sanitation service delivery atema nübu nüngdakba asadangba, SWM Rules mapa kuma

inyaksü atema tourist aser temeshi tesemtem jangjateta special mechanisms amenoktsüba densema tongtipang teinyaksütem reprangtepa liasü.

Ketdangsür temi mapang shidak nung nükjidong atongtsü asoshi item maparen mapang shidak nung inyaksü tongtipang lir ta jembia liasü.

Committee den Swachhatam Portal indanga lemsatepa liasü, koba Ministry of Housing and Urban Affairs indang digital monitoring platform ka lir, kong Swachh Bharat Mission (Urban) inyakba reprangteter.

Iba portal ya ajanga Urban Local Bodies aser States temi ita shia sanitation aser waste management indang osang agütsür, GIS-based city profiling inyakteter, sanitation assets meteter aser Swachh Survekshan amala inyakyim asadangteter.

Department balala nungi ketdangsür temi Solid Waste Management Rules, 2026 tajungba nung mapa kuma inyaksü asoshi tangatetba lemsatepa liasü.

TM GHSS Kohima nung azünger nem nükraksü angati agütsü



Kohima, Luroi/August 04 (TYO): Department of Health & Family Welfare ajanga August 4, 2026 nü National Programme for Control of Blindness & Visual Impairment (NPCB & VI) kübok TM Government Higher Secondary School, Kohima nung azünger kaketshir 34 nem nükraksü (spectacles) angati agüja liasü.

Iba oset lema agütsüba sentong nung Dr. Phiyantsuthung Joint Director & Programme Officer NPCB & VI, Department of Health & Family Welfare ajanga NPCB & VI kübok tongtipang teyari

pezü indang lemsatep, koba tenük cataract nungi kumzüka ayuba, taintem nem nükraksü agütsüba aser kakets reju nung tenük reprangba aser tenük tenla agütsüba alitsü, ta ashi.

Kaketshirtem tenük tendangtsü atema kakets reju balala nungi Department dang asüngdangba atema pelaba pai lemsatepa liasü.

Nükraksü angati agütsütsü atema computer amshia tenük tendangba, Autorefractor amshir, ta pai ashi aser 2026-27 mapang nisung 7,200 jangjateta iba teyari agütsütsü state nükjidong lir ta metetdaksü.

Dr. Phiyantsuthung-i teti nükraksü yimya shidak amshia inoktsü asoshi sayua liasü aser kaketshirtem dang 'screen time' ajema tenük anepalutsü ajungshia liasü.

Department of Health and Family Welfare ajanga kaketshir temi nüngdaka aliba nükraksü agütsüba aser awareness tajung agütsüba atema Principal, TMGHSS Kohima, Kelhikha Kenye-i pelaba lemsatepa liasü.

Iba sentong nung Er. Khriezosiuetuo Suohu, Vice Principal aser Liza Zhimomi, Graduate Teacher dena liasü.

Higher Education Dept.-i NGESSO atema metetdaksür

Dimapur, Luroi/August 04 (TYO): Nagaland nungi Naga nung lisopur kaketshirtem state alema oa linük tesem balala nung azünger tia makai asüba mapang Department of Higher Education, Nagaland ajanga Ex-Gratia sen 5 lakh agütsüba Nagaland Government Ex-Gratia Scheme for Students Studying Outside Nagaland (NGESSO) mapa kuma aoba osang ka metetdaksüogo.

Iba scheme agitsü atema

kaketshirtem Directorate of Higher Education, Nagaland nung rehister süa alitsüla.

Academic year 2026-2027 atema Registration Form (Fresh/Renewal) aser nüngdakba osangtsüsang tem Directorate indang website h t t p s : / / highereducation.nagaland.gov.in nungi download sütettsü.

Registration Form ya September 30, 2026 tashinung agütsütsüla, ta Department sangdong ajanga ashi.

DC Kohima-i I-Day atema metetdaksür

Dimapur, Luroi/August 04 (TYO): Deputy Commissioner, Kohima indang office ajanga Heads of Departments (HoDs) ajunga dang Independence Day 2026 atema Deputy Commissioner, Kohima indang Office nungi invitation cards aser car passes tem meshitsü metetdaksüogo.

Deputy Commissioner Kohima, B. Henok Buchem, NCS-i sangdong ka agütsüba nung, invitation cards aser car

passes ya August 13, 2026 nü nungi tenzüka office mapang arua meshitsü akok, ta ashi.

Ano paisa sangdong ka nung Kohima District kübok aliba Heads of Offices ajunga aser Kohima Sadar (Urban and Rural) kübok Gaon Buras ajunga August 15, 2026 nü Nagaland Civil Secretariat Plaza, Kohima nung Independency Day amungba nung shilem agitsü metetdakja liasü.

Drugs Control Officers training temogo

Dimapur, Luroi/August 04 (TYO): Drugs Control Officers tasenpur nem ita ka Induction Training agütsüba tembangba aser Narcotic & Psychotropic Online Monitoring and Auditing System (NPOMAS) semzüka sentong ka Directorate of Health & Family Welfare-i Drugs Control Administration ajanga August 4, 2026 nü Drugs Control Administration, DHFW indang Conference Hall nung ayongzüka liasü.

Sentong akhumdong ama Dr. Mereninja Senlem, Principal Director, DHFW aden. Drugs Control Officers tasen shima alir nem ozüng shidak amshia nübur tenzüksü asoshi nüngdakba shisatsü, skills aser yimya sayutsü atema yangluba induction training program

tembangba nüngtem nung iba sentong ya ayongzüka.

Iba sentong nung Narcotic & Psychotropic Online Monitoring and Auditing System (NPOMAS) semzüka, koba narcotic aser psychotropic substances mitba aser ketdangsüba tajungba akumtsü atema yangluba digital sapang ka lir.

Iba system yagi real-time stock monitoring süteter, digital record tem anepaluteter, prescription tejangja aser mozü lemsaba ketdangsüba tajungba kumdahtsür. Iba sapang ya ajanga tali ochishia, tejangjaba nung ozüng shidak amshia inyaktettsü aser department nung temelaba agüja alir ketdangsür temi tajungba nung ketdang sütettsü.

Alima lendong agi Mokokchung...(Tapak1nungi...)

Mokokchung town ward nunga tang tashi nung anentsüh agi kibong 11 dak kongshia lir, item lendong nung kaketshir ana (2) taküm sama aser ka kanga mejungi yiruba osang tejangja lir. Takoksa ajurur kibongtem DDMA ajanga ex-gratia aser teyari balala agütsüba Mokokchung DC-sa metetdaksü.

Changtongya Sub-division kübok Changtongya-Longleng highway kanga mejungi raksar liasü saka tia junga tawa tanü nungi gari tilabo senzütettsüsa lapoktetogo. Amguri lenmang anener aoba ajanga yim aika Asetkong lenmang dang agidaki. Chuchuyimlang Division kübok Salulamang yim lenmang kanga mejungi raksaa lir saka tangji tanga lenmang ka nungi jajaba osang angazüker. Kubolong Circle kübok Longjang yimda kibong ana nung anentsüh

lendong agi kongshia lir.

Alima lendong balala agi kongshia alirtem nem teyari agütsütsü atema Mokokchung district nem Nagaland Chief Minister-i NSDMA nungi sen lakh 36 agütsüba den ano Ao Senden-i anir Watsü Mungdang, AKM, Ao Officers' Telongjem, Minister Imna Along Longkumer aser ano lokti balalai amalitepa teyari balala agütsüba asoshi ajak dang pelaba Mokokchung DC-isa metetdaksü.

Tanü nungi tenzüka hopta piyong Mokokchung district nung tsünglu sashia arutsü tsüngsang mopungi sayur, anungji, nisung ajak saksalema alitsü asoshi paisa tekümdangtsü o ka metetdaksü. Iba senden nung Mokokchung ADC, Atsunga Walling aser NSDMA nungi ketdangsür Temsuwangshi Jamir nadia shilem agia liasü.



TIR YIMYIM YIMOBILEM (EDITORIAL)

DIMAPUR WEDNESDAY, AUGUST (LUROI) 05, 2026

Nagaland-i asaa tzünglu arudaktsü asü?

- P Tiamongba Aier

July 19, 2026 nü Upper Assam nung tesem aika tzü agi metsüngbangba atema MLA temi anir lokti tentet balalai Nagaland dak tai tongloktsüogo. Assam nung Sivasagar MLA Akhil Gogoi-i anir Assamese Youth Forum aser Axomiya Yuva Samaj teloktemi Nagaland ajanga Assam nung tzümetsüung tensa adokdaktsü ta aija jembir. Akhil Gogoi-ibo Mon district kübok Naginimora nung "Dikhu Hydro Electric Project" den sendakba tzünokdang ka nungi tzü chiokba densema Upper Assam district tem nung tzümetsüung timtem adokdaktsü ta pai tai tongloktsü. Külen, Assamese Youth Forum aser Axomiya Yuva Samaj teloktemi Nagaland nung tenem tudokba aser ozüng alema nakmati atuba ajanga Upper Assam nung July 2026 tzümetsüung timtem adok ta aitsür. Reprangdanga aru nung item osangtem social media nung kanga prokshir aser talisa manguribo amangtsüsa Facebook, Instagram aser WhatsApp ajanga tiyazü aser kuli maliba osangtem kanga prokshia arudar. Assam nung lendong kaji osangbenertem lir aser kodangsa Assam o kidanger state kar tsüngda ken o mesüra mangatettep adokdir, Assam osangbenertem ajakbo masü saka parnok aikati külen tsütsü dang shir osang zülua prokshir aser aiben kidanger state tem ang tai mesüra aibelenba ama tangaribo angatettsüsa sangdonger. July 19 sülen Upper Assam nung tzümetsüung tensa ajurua lia osangbener aikati pei pei bushitetba osangtem züluogo aser parnok aikati Nagaland aija mesüra tai tonglokja züluogo. Saka, item ajakji züngshiaka mesüra angashiaka Nagaland sorkar nung Chief Minister-i anir MLA mesüra Minister temi yimjak nung tasütait sangdong ka danga agütsüba mangur aser iba atema kanga sasaa bilemer. Assam nung tzümetsüung tia ajuruba Nagaland-i asaa tzünglu jazüka arudaktsür tzü yimzüka yokba ajanga atalokba masü aser Assam nung tzümetsüung ya taküm mezüng atalokerba masü saka kümshia ataloka arur. Alima yimya agi tenemlen nungi tzü lendenleni yimzüka alur aser kasaji Nagaland, Meghalaya aser Arunachap Pradesh nungia ayongtem ajanga Assam leni tzü yimzüka lua Brahmaputra ayong nung yimoker. Talisa, Assam nung dang masü saka July 19 nü Nagaland nunga tesem aika nung ajungben tzümetsüung aser anentsüh lendong balala atalokogo aser tia maka Mon jila nungbo nisung 8 tashi taküm samatsüsa anentsüh lendong tulu ajurua liasü. Külen, iba mapang anentsüh aluba aser tzümetsüung agi timtem bentsür arubatem ano meinyaktem lir. Anungji Nagaland sorkaria yimjak nung telangzütsütsü timbo langzütsüla sernung ola kecha madokba atema kanga ratar aser sasar. Chief Minister mesüra Home Minister mesüra lendong atalokba tesemtem nungi bangdak MLA tem mesüra ketdangsürtemi osangkaket aser media sabang balala nung tangari Nagaland dak tiyazü nung tai tongloktsüba aser aitsüba yabo meyiptsütsüla sernung kecha mali. Küna, Konyak Union-ibo mapang shitak nung item onüktem tamendakdak kuli kecha mali aser tiyazü ta metetdaktsüogo. Mon district nung hydroelectric dam mesüra reservoir kecha yanglua mali aser Dikhu project ya paper nung zülua aliba dak alaka kecha mali aser ano arrtsülen ozüng alema nakmati aruba maparen kecha meinyaker ta Konyak Union-isa jangjatsüogo. Anungji parnok tali metenja aser osang tali jangjashija Nagaland sorkaria ola adoktsüla aser külen Naga nungeria social media nung tashitsü timbo shia ochi prokshitsüla.

OLEMSABANG

ASEN MEYONG SENMANG ASE SASA MESENMETO MASÜTSÜLA

~ L. Kika Pongener

(Yashi adok nungi...)

Aor tar nunger otsü ka..."Tangar asang-kolak agi nisung kolak mesuka yanglur; ibaji ammer tsüngsangba ngur...Tongmelang nisung ka; tsüngsanger telok dangji nia nenok den tsüngsangdi ta asüngdang....Idangji na onok den tsüngsangnura; netsü kolak (Your mother's head) lepzüka bener arung...ta ashi. Anungji pa-a parnok den tsüngsangnuba agi tetsü kolak tangzüka bener ao...Idangji par medemer jagi waaaa....!!! Nabo netsü kolak bener aru....??? Onok-bo asang-kolak ako....ta sayu....!!! Ibaji ngur iba tongmelang nisungji kanga aoksa....!!! Aser teko ajak tsüngsa-a anakdena ajepba tanü tashi otsü-sutsü jembir. Iba tongmelang nisungji mesuka....Tanü Aor lennir tajung karbo; tangar tarutsü nukla aser nukjidong balaka yur tsüngsangba iba sentongji mangateti....Tangar asem (Drum) atemdak tashi ajak agi jokdena tsüngsanga....Pei sasa pei jenjang akotoka-atokba lennir karbo lir. Tanübo Aotsür Aor tangar jakla mangu ta ashitsüsa; lenla ajak nung tangar sulen tanidaker kümogo. Asenoki asen tsüraburi alangzüka yutsüba senmang aser yimli tajung asen sasa sensa-masar. Küm aika tejaklen nungi tangar kintemi Aor menupa akümtsü meranga aruba tanü asangsang nung ataloka....Tanübo Aor Political Field nung, tema sorkar, telung sorkar aser lenla ajak nung tangar sulen tanidaker kümogo.

India nunger otsü nung....19th Century nung British nunger shishilempar telok ka India limai aru....Iba telok India limai arubaji; India limaji parnoki amokbanger yimsu asütsüba nukjidong nung aruba masü. Otsü angazükba agi, India limaji ali telung nung aliba senti rongsen nung kanga takar liasü. Yongji, item senti rongsenji agiteta shibelen bener oa; par lima nung shishilempatsü nukjidong nung aru. Ajisuaka, iba putu nungji India limaji Province tilala aika lemsar; Province shia nungji chuba ka-ka-ti timsüsüa liasü; aser item chubatemji kanga-sa meputep; kati ka madak tashi amshitsü aser kati ka akoktsü meranga, tsükchitepa, arishitepa liasü. Aser parnok rongnung kati ka madak takok ngunudang British nunger shishilempar telok nungi teyari agia liasü....Aser chuba shirnoki British nunger teyari agi panok jagi takok angu. Aser item chubatem jagi British nunger den longjemer; tanüngba chubatem madakji tashiyim agi tashi amshia yimsu asü. Iba amaji tanem-tanemi British nunger nemji ajepbangdaktsür....India lima ajunga England lima nungi yimsu asütsüsa kuma-adok. Iba amaji "An molokpang nung atem ama"....Lisopurtemji tesulen arur bendanger küpok alitsüsa aküm. Ibaji mesuka asen Aor asen o asen na tsüngda meputepi arishitepba agi tanübo asen Aor lenla ajak nung tangar kin küpok alitsüsa kumadokogo.

Aotsür Aor senso tajungtem...Asenoki asen mapa aser asenok lia aruba khen meyipa reprangshidi....Shitsü (Monkey) ana amtsük ka raktepa tena sasa mebendangteti Shirong dangi ao....Aser amtsük rangben songjen Shirong-la nem chidaktsüba ama.... Asen o asen na meputepba ajanga tangar kintem nem maongka agidaktsür. Tanü asen Aor timsüsür aser lennir tajung aikati sen-yong, supokrem-yong aser shi-ango tilaka-yong asen yimli/senmang ayoker. Otsüla oboula nungeri alangzüka yutsüba yimli aser senmang tajung; makamait-yong, sen-yong aser supokrem-yong ayoker. Otsüla oboula nungeri alangzüka yutsüba senmang asen jaklaliru majungba, libaliru masüngtetba aser shi-azü mazüokba agi asen sasa mesenmetor. Tanü Aor tangar kin dang tejak koda mesayu maaksu tia nung lir. Esau-i pei tambu senmang aya marem ayokba ama....Aor-i pei temeden ochimashiba rongsen-yong ayoker aser asen tsüraburi alangzüka yutsüba senmang asen sasa sensa-masar. Aor-ji Naga nunger kin ajaki nungjang petinu amai penzüa repranga aliba; tanübo tangar kintem menudong kin ka kümogo.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Liangmai Baptist Association pur Bible Study cum Board Meeting kaogo



Jubilee Memorial Hall Mission Centre, Tening Town nung Liangmai Baptist Association Men Department pur Bible Study cum Board Meeting alidang tangokba noksa ka yangi angur.

Dimapur, Luroi/August 04 (TYO): Liangmai Baptist Association Men Department pur Bible Study cum Board Meeting August 3-4, 2026 anogo Jubilee Memorial Hall Mission Centre, Tening Town nung "What is that in your hand" omen nung ajemdaker ayongzüka liasü.

Iba sentong nung shisalen sayur ya Apfukru Dolie, Missions Director, Angami Baptist Church Council (ABCC) liasü aser Men Department, Liangmai Baptist Association (LBA) ajanga ayongzük.

Iba sentong nung Mission Director, ABCC, Apfukru Dolie-i Laishiba nungi Mosa takum otsü athishia jembi aser

ajungmesoa liasü aser Tsüngremi asen ket nung aliba amshia Pa tashi sayur ta ashi.

Tongtipang mapa inyaksü atema jenjang akaba aser tangari aginüba osettem menügdaker, ta pai ashi aser Mosa ajok ya mezüngbo balaka meliasü saka Tsüngremi aji amshia sayatenya tulu inyaka Israel nungertem Egypt nungi anir ao ta ashi.

Taoba mapang aliba kasa Tsüngrem yagi asen dak aliba sempet amshia takok tulu kumdaktsütsü aser sayatenya inyaksü, ta ABCC Mission Director-i ashi.

Iba sentong nung LBA kübok Nagaland tesem balala nungi aliba arogotem nungi

nisung 72 arua shilem agia 'Official body' tejangja ka tentettsü pangjema liasü aser iba atema parnok finding committee atema züngsem asem shima liasü.

Senden nung Couples Seminar ayongzüksü, tebutem asoshi tsükong shia Discipleship Training ayongzüksü aser Men's Camp 2026 ayongzüksü renema liasü.

Rev.N.K. Joseph, Secretary, Men Department LBA ajanga tebutem dang pei arogo nung Tsüngrem indang mitkar ama tali meranga inyaksü aser samar alibapur anidentsü ayongzük aser pei arogo nung sentong tali ayongzüksü ajungshia liasü.

ANOGO ABEN TSÜNGREM DEN

Parnok Tsüngremi aniba nung anidak

Parnoki parnok shisatsü nung mezüngbuba Tsüngrem tiyongtsü südaktsür Pai aniba nung anidak. Messiah atema shinba parnok koda angazük asenoki memetet. Tsüngremi parnok Kinü Yisu dangi anitsü ta amang., asenoki aji dang metetet. Anüng nung aliba temangtem metetta alibaji shisa akar yimya liasü. Parnoki tasen Chuba asoba temaitsütem anogo aika anüng nung bushir alitsü südi. Petinui anibaji parnok Tsüngrem temeyong agi parnok aniba ama parnok agizük.

Tsüngremi aniba nai metetta lir ma? Iba ochi iba anogo nungi tanü tashi memelenshir lir. Shibai Tsüngremi aniba nung anidaker pa/la shidakba shisa taka lir. Anüdoklen nungi item tashi temetettertem nem leman atema mapa magütsü, parnok nem petinu dang ka agütsü. Parnoki tesangwaji dang anidak, aser ibaji asoshi Tsüngremi parnok dang pela. Kari ashir, "Tsüngremi mulungba talang nung lia metettsü asoshi asenok jilia talang ka orr atatsüla." Ibaji shidak masü! Tsüngremi asenok nem jili leman mesayur, saka Pai asenok mera shiaji anüker.

Pai ne leman anitsü, A. Shin züluri ashir (A.Shin 3:6). Tsüngremi Israel chirtem nem anüng mepet tongshi ka aser aonung mi tongshi ka parnok anitsü asoshi agütsü. Pai shisa kartem nem petinu dang ka agütsü. Tanü Pai asenok den yamaji meinyaker, saka asenok jakdang Pa aotsü Pai nangzüka lir. Asenoki Kibuba tsütsü mera ka aotsü mulungra Pai asenok tsütsü mera ana arutsü. Tanü shirnoki Tsüngremi aniba nung anidaker parnok shisa akartem lir.

West Bengal nung missionary tem dang par mission yutsütsü ashi

Kolkata, Luroi/August 04 (Agencies): West Bengal nung yimtsüng ka nung aliba mission center nung inyaker Claretian missionary tem dang Hindu nunger telok ka parnok alidaki arua hopta ka tsüngta ainshitsü ashiba sülen parnok tetsübo nung alir.

Item nisungtem ya July 31 nü North 24 Paraganas district kübok Nazat nung aliba mission center telungi tashiyim amshia aita yangji tamangba yimsü melendaktsür aser bendangeri senotsü teyari agüja mapa inyaker ta tao tongloktsü, ta police nem First Information Report agütsüba nung shia lir.

August 3 nü UCA News den jembidang Diocese of Baruipur kübok Claret Premaloy (abode of love) indang priest in charge, Father Anuj Hembrom-i ashiba agi, nisung ti nungi ter tsüngta arua parnok dang kechiba yangi alir aser kechi mapa inyaker ta asüngdanga liasü.

Parnok rongnung nisung kati pasasa pa ya "local Hindu councillor" ta ashi aser parnok anogo tenet sülen meyipa arua onok mainshi lira temalen nungi mission ya shibanga yutsütsü ta ashi, ta putiri ashi.

Parnok ya nok-nü bena meliasü, saka parnok ki aser kima gari anena aliba tem noksa



West Bengal nung Claretian mission center ka telungi July 31 nü Hindu nunger telok ka aita missionary tem dang hopta ka tsüngta iba tesem yutsür ainshitsü ashiba mapang tangokba noksa ka yangi angur.

tangoker ao, anungji missionary tem tebilemtsü akar.

Missionary temi maka maiter tribal aser Hindu nungertem Khristan yimsü dangi meyipdaktsür aser iba ama mapa inyakba nung yaritsü atema bendanglen nungi sen agizüka amshir ta parnok ashi.

Parnokisa iba tesem nung Catholic nunger kibong kwi alir ta asüngdanga liasü.

Tasügnep, August 1, kasa telok nungi nisung asem anepdang 9:30 ako meta meyipa arua kechiba yashi iba tesem azüngtettsü ashiba senzüka yutsür ta missionary tem dang asüngdang.

Parnoki July 31 nikongdang FIR ya agütsü aser iba sülen police temi mission center ya semdang aser parnok kumzüka ayutsü ta ashi, ta Hembrom-i ashi.

Iba tatalokba ya ajanga yangji aliba Catholic nunger temulung nung anisüngzük mangur, ta Bishop Shyamal Bose of Baruipur ajanga ashi.

"Ozü nüburtem temulung nung anisüngzük mali, saka lungjemer lir, aser ozüng shidak amshitsü ta amanger," ta pai UCA News dang ashi.

State nung Khristanpur anema mapa tamajung inyakba tali akumba asoshi shisabolur, ta

Bose-i ashi.

Claretian Missionaries indang major superior, Father Peter Johnson-i Catholic nunger aser nüburtem dang missionary tem asoshi sarasademtsütsü aser iba ama mapang parnok den nokdaktsü ayongzük.

Claretian Missionaries ya 19th century mapang Spain nung tenzük aser India nung küm aika tenzüka arur, kong education, pastoral ministry aser social outreach nung tali temulung agüja talisa tajemzüka jenjang nung alirtem asoshi inyaka arur.

Bangiya Christiyo Pariseba (BCP mesüra Bengal Christian

Council) ajanga ashiba agi, West Bengal nung Hindu nunger bhukumba Bharatiya Janata Party-i taküm May ita state election nung takok ngua sorkar kumtetba sülen Khristanpur anema inyakba tali kumogo.

Tekülem ki raksatsüba, sarasadem sentong nung meinprongba aser pastor aser tamanger tem amokmerenba ya state tesem ajungalen kanga bolua kumogo.

Iba ama maneni atalokba ajanga West Bengal nung tamangertem mulungjang nung tetsübo aiddaktsür, ta Khristan lenirtem aser lokti tentet balalai ashir.

Advocacy telok temi ashiba agi, item tatalokba ya aika mesüktepa lir - bendangeri senotsü teyari agütsüba amshia tashiyim agi tamangba yimsü melendaktsür ta tai tonglokja linük anemer nüngja agütsür.

Tatalokba ajak nungbo yimten yimsüsür sendaktepa aliba kuli meliaka, yimten melenshiba ajanga temulung ulushir Khristanpur anema inyaker ta aikati ashir.

West Bengal nung nütsüng yongsük million 90 aliba nungi Hindu nunger shilem 70, Muslim nunger shilem 27 aser Khristanpur shilem ka majung lir.

AO OSHI ANGAZÜKDAK:**TANÜ ANGAZÜKTSÜBA OJANG****Zülu**


(v) teka aser temeyong agi ojang adokdakja inyakba (write)

* Lanurtemi yimten dangi shiti ka zülu.

Zülüjang

(n) ojang adokdakja zülu dang amshiba o tejang (alphabet, letters)

* Ao zülüjang ajak agi 27 lir saka English zülüjangbo 26 dang lir.

OLONG PAITEP # 7588**TIPIEN**

1. Nisung jenti
4. Tsük rudenba
6. Temzüng tesashi
8. S _ _ i
9. Nisung rongnung telemasa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

OLONG PAITEP # 7587 TELANGZÜBA**TIPIEN :**

1. Semtu, 3. Lepko, 5. Bilem, 8. Ulu,
10. Tsünpang, 11. Tesangwa,
13. Aoksa, 15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER

Alima nung tebur professor tanubosangji Nathan Thomas lir ta Guinness World Records (GWR)-i metetdaksüogo.

Florida, US nungi Nathan arishi küm 18 ser anogo 346 tain lia Miami Dade College nung tesayur inyaksü tenzüka liasü.

Nathan arishi küm 10 asüdang Miami Dade College nung dual-enrollment program ka ajanga azüngtsü tenzü. Pa arishi küm 14 asüdang Associate of Arts in Mathematics züngtem aser arishi küm 16 asüdang Florida International University (FIU) nungi Bachelor of Science in Electrical Engineering nung graduate asü aser arishi küm 18 nung Master of Science in Electrical Engineering with honors nguogo.

Nathan-i intellectual property law (STEM fields) nung specialize akümtsü meranga law degree angutsü tezüngdak lir.

Simaluguri nung tzümetsüing ajanga train services nung kongshir

Maligaon, August 4, 2026 (TYO): Sibsagar district kübok Simaluguri aser temeket nung tzünglu kanga aruba aser tzümetsüing ajanga Northeast Frontier Railway (NFR) ajanga train kar thinenogo aser kar lenmang tangalen ajanga senzüdaksür.

Iba tesem ya NFR nung Tinsukia division kübok densemer aser parnoki train balala indang osang metetdaksüogo.

Diversions of Trains via Rangiya - Rangapara North - North Lakhimpur - Dibrugarh:

Train No. 15959 (Howrah - Dibrugarh) Kamrup Express 04.08.2026 nungi apusoba.

Train No. 15910 (Lalgarh - Dibrugarh) Avadh Assam Express 02.08.2026 nungi apusoba.

Short Termination/Short Origination of Trains:

Train no. 15669 (Guwahati - Dibrugarh) Nagaland Express 04.08.26 nungi apusoba train Mariani nung tembangtsü aser Mariani o Dibrugarh tsüingda thinena atar.

Train no. 15670 (Dibrugarh - Guwahati) Nagaland Express 05.08.26 nungi apusoba Dibrugarh o Mariani tsüingda mesenzütsü.

Diversions of Trains via Dibrugarh - North

Lakhimpur - Rangapara North - Rangiya - Guwahati-Rangiya-New Bongaigaon:

Train No. 12423 (Dibrugarh - New Delhi) Rajdhani Express 05.08.26 nungi apusoba.

Train No. 20503 (Dibrugarh - New Delhi) Rajdhani Express 05.08.26 nungi apusoba.

Train No. 12424 (New Delhi - Dibrugarh) Rajdhani Express 04.08.26 nungi apusoba.

Train No. 20504 (New Delhi - Dibrugarh) Rajdhani Express 04.08.26 nungi apusoba.

Diversions of Trains via Dibrugarh - North

Lakhimpur - Rangapara

North - Rangiya - New

Bongaigaon:

Train No. 15909 (Dibrugarh - Lalgarh) Avadh Assam Express 05.08.26 nungi apusoba.

Train No. 15960 (Dibrugarh-Howrah) Kamrup Express 05.08.26 nungi apusoba.

Train No. 22504 (Dibrugarh - Kanniyakumari)Vivek Express 05.08.26 nungi apusoba.

Train No. 15946 (Dibrugarh - Howrah) Kamrup Express 05.08.26 nungi apusoba.

Mizoram MLA Royte-i itasen ajunga tenla agütsür

Aizawl, August 4, 2026 (Agencies): Mizoram MLA aser taoba Cabinet minister Robert Romawia Royte-i pa indang itasen ajunga sensakertem aser makamaitertem yaritsü asoshi tenla agütsüogo.

Taoba ita 90 atongtepa Royte-i pa indang itasen Rs 1.25 crore jungnua tenlaogo. Pai December 2018 nungi June 2026 tashi dedicated charitable account ka nung pa indang itasen ajunga enokja arur.

Pai ita 60 tashi Cabinet Minister inyakba aser ita 30 tashi MLA inyaka aruba itasen ajungalen tenlaogo aser iba sen ajanga welfare aser humanitarian maparen inyaker.

Iba charitable account nungi senotsü endokba nung tashishitsü malitsü atema kanga junga kulitem bendena lir aser



"2018 MLA election jakdang ni lemtet ana külemi agi. MNF nungi tokteptsü aser takok ngura kü itasen ajunga agi sensakertem yaritsü lemtet. Ni yamaji inyaker aser maneni inyaka aotsü" ta pai metetdaksü.

Taoba Minister Royte ya entrepreneur ka lir aser pa senotsü jenjang junga aliba agi sorkar nungi anguba itasen ajunga agi tenla mapatem inyakteter ta ashir.

"Prime Minister Narendra Modi-i Gujarat nung Chief Minister inyakdang personal savings ajunga tenla agütsüba ajanga ni ajungmeso. State secretariat employees nung jalatem shisaliok bushiba nung yaritsü atema welfare fund ka nung Modi-i tenla agütsü" ta Royte-isa ashi.

Tripura nung Tea Auction Centre ka lapoktsü

Agartala, August 4, 2026 (Agencies): Tea Board of India (TBI) ajanga Tripura nung Tea Auction Centre ka amenoktsü maparen tenzüko aser iba ajanga tea marketing tip atemtsü aser Northeast nung tea sector tashi aittsü.

Iba mapatong asoshi Kolkata nung aliba Tea Board headquarters nung tawa tu senden ka ayonga menogo.

Iba senden nung Tripura Tea

Development Corporation (TTDC) Chairman Samir Ghosh, Managing Director Rajesh Kumar Das aser Tea Board ketdangsürtem aden.

Iba auction centre ajanga Northeast nung tea growers aser producers ajanzüktsü aser national markets nung Tripura tea tali jangjatsü ta Ghosh-i ashi.

Iba mapa ajanga shishilembatsü maongka tasentem lapoktsü aser state nung tea industry ajungkettsü

ta paisa ashi.

Tea Board of India aser Deputy Chairman C. Murugan nungeri iba mapatong pusema nungitba aser Northeast nung tea economy tashi itdaksüba atema pelar ta Ghosh-isa metetdaksü.

Tripura ya CTC black tea atema züngshir saka parnoki orthodox, green aser white teas indang production ulushir aser domestic o international markets nung meteta kümogo.

GOVERNMENT OF NAGALAND**OFFICE OF THE LABOUR COMMISSIONER**

NAGALAND::KOHIMA , New Capital Complex

NO.LBR/TECH/117/87 (VOL-IV)

//

Dated Kohima, the th July, 2026.

NOTIFICATION

This is the second general information that the following Trade Unions registered under Section 8 of the trade Unions Act, 1926 are found to be defaulting / non-functuinal and hence are liable for deregistration by the Registrar of Trade Union.

1. Dimapur Motor Workers Trade Union, Dimapur.
2. Dimapur Auto Rickshaw owners Union.
3. Dimapur Land Transport Workers Union.
4. East DimapurPurana Bazar Labour Trade Union.
5. Dimapur Taxi Drivers Union.
6. Dimapur Cycle Rickshaw Pullers Union.
7. Dimapur Truck Drivers Union
8. Kohima District Land Trasport Trade Union, Phesama.

On expiry of the first notification of 30 (thirty) days the defaulters are hereby notified that any Trade Unions that intend to resume its activities and avoid cancellation must submit a formal intimation to the Registrar of Trade Union within 15 (fifteen) days from the issue of this notification.

Failure to respond within the stipulated period shall result in the initiation of necessary proceeding for cancellation of registration as per relevant provisions of the trade Unions Acts and Rules.

Sd/-

AVILE VITSO

Labour Commissioner Cum
Registrar of Trade union
Nagaland, Kohima.

Mesamatsü dang maongka tatembang ka agütsüner: Trump



Washington, Luroi/August 04 (Agencies): Tehran-i nunga ta shiaka US Tir Donald Trump-i Iran den jembishinü akar ta Hombarnüa nenshia ashi aser Islamic Republic ya mesamatsü dang tezüngzüktep yanglutsü maongka tatembangba agütsür ta ashi.

White House nung osangbener tem den jembidang, Saudi Arabia, United Arab Emirates, Qatar aser tanga linüktem nungi mepishiba sülen pai Iran den maneni jembishinütsü mulung ta ashi.

"Parnoki kü dangi call asü

aser imlibilema temak, onoki tezüngzüktep ka yanglutsü ta ashi. Aser ibaji shidakba lir. Aser ajaki aji meteta lir," ta Trump-i ashi.

"Parnok mesamatsü dang ni maongka tatembang ka agütsüner. Ni mitkar mapa tulu meinyaki liner. Ibai inyaksü kanga tasak. Ni nüburtem nem maongka tasen agütsütetba atema ni tejak tenteter," ta pai ashi.

Aji masü dang Iran indang foreign ministry-ibo Washington den indang indanga jembishinüba mali ta shia liasü,

saka Trump-i anosa jembishinüba mapang lir ta nenshia ashi. "Onok tang jembishinüba mapang lir," ta pai ashi.

Strait of Hormuz tanaben lapoktsü aser Iran indang nuclear programme tebilemtsü angatetteptsü nung rangloker jembishinür, ta Trump-i ashi.

Iba tzü lenmang ya asüng tashinung lapoktsü aser denuclearisation ya mapang talangba agitsü, ta pai ashi.

Taoba mapanga Trump-i Iran dak kanga sashia amaktsü amokmerena liasü, saka tezüngzüktep yanglutsü teimla lir ta shia mamak.

Ajisüaka Iran-i jembishinü ya Washington den masü Oman den Strait of Hormuz dak sendakba atema lir ta ashir.

"Onok ya Oman den Strait of Hormuz ajanga senzötsü atema jembishinü akar," ta Iran foreign ministry odongtar Esmaeil Baqaei-i shia liasü.

Hamas-i nok-nü toktsüba sülenang Israel ainshitsü: Board of Peace

Jerusalem, Luroi/August 4 (Agencies): US-i aniba Board of Peace-i ashiba agi, Hamas puri parnok indang prangbong injang aser hadirtem ajak toktsüba sülenang Israel nunger sepaitem Gaza nungi ainshitsü.

Board of Peace director, Nickolay Mladenov aser Israel Ato Kilonser Benjamin Netanyahu na senden ka amenba sülen iba osang sangdonga liasü.

US Tir Donald Trump-i taoba Brehostibarnü sangdongba tenangzüktepba dak temulung masüba indang Israel nunger yimden yimsüsürtemi metetdaksüba sülen Hombarnü Jerusalem nung iba senden ya menogo.

"Osang tai agütsüba dak sendakba nung, Hamas puri ken o sensaksemtsürtem dang nangzükbba ama parnoki prangbong injang aser hadir ajak toktsüba sülenang Israel nunger sepaitem ya Yellow Line adena aotsü," ta Board of Peace-i ashi. Israel aser Hamas na rara tembangba sülen Gaza ketdang asütsü atema Trump-i January ita iba board amenokja liasü. "Prangbong injang, hadirtem aser facility tem rongnung prangbong tulu tila ajak aser tunnel tema densema lir," ta kasa sangdong ajanga metetdaksü.

"Yellow Line" ya Gaza nung Israel nungeri atsünger aliba tesem arrtsü dang ajar.

"Nükjidongji tejangja aser iba ya tasüngdangba ka masü: Strip nung prangbong injang aser hadirtem ajak toktsütsüla aser prangbong agi yimsüsüa aliba toktsür nüburtemi yimsü asütsüla," ta Board of Peace yagi senden tembangba sülen social media post ka ajanga ashi.

Kasa mapang nung Hamas-ia, nangzüktepba ama Israel-i parnok shilem minyakra tenangzüktepba ya benoka minyaktsü takhangba agütsüogo.

Sensaksem mapang Mladenov-i Netanyahu dang Gaza amakba anentsü atema temepishiba ka agütsüogo, ta senden nung jembiba jangja aliba nisung anati Associated Press news agency dang ashi.

Ajisüaka Israel-i iba temepishiba magizük. 2025 küm October ita ceasefire benokogo, saka iba sülen Israel-i Palestine nunger 1,200 dak tema tepsetogo, kong disarmament deal sangdongba sülen nisung 36 tepsetba densema lir.

2023 küm October ita rara tenzükbba sülen Israel-i Gaza nung Palestine nunger 73,000 dak tema tepsetogo.

Senden mamen tsünga Netanyahu indang office-i ashiba agi, tenangzüktepba koba yimjak nung sangdongogo, iba yagi Israel tamendakdak mesayur, aser iba tebilemtsü ya parnoki US den lemsatepogo.

Israel Ato Kilonser-i aniba far-right sorkar züngsemtemi, parnoki tenangzüktepba nungi atsünger ta shiogo.

Finance Minister Bezalel Smotrich-i, Israel sorkari agizükba tenangzüktepba dang nungi yimjak nung sangdongba tenangzüktepba ya khenyongi balaka lir, ta shia tanga tang vote agishitsü atema takhangba agütsüogo.

Israel-i tenangzüktepba amai mesüi aiben inyaksangshia aruogo, aser sensaksemba mapang atsüanem makaba atema aiba aija aruogo.

Trump-i tenangzüktepba ka yanglutsü atema nongshiba mapang tang item tashishibatam


adokogo, ajisüaka Israel nung election atongtsü ita ishika dang lia Gaza nung takok anguba sayutsü atema sorkar tali nongshidar.

Hopta tatemi Gaza amakba atema Mladenov-i Israel metetshi-i parnok aitsüogo. "Teti asoshi yimjung bener arutsü temela masü, saka ajaki takok tashi merangdangra takoktsü lir," ta pai zülutsü.

Egypt, Qatar, aser Turkiye shirnoki tiyongtsüi ia disarmament deal yangluogo, parnoki külem sangdong ka ajanga Israel-i nüburtem aser healthcare facility tem amakba aitsüogo, aser ashiba agi, iba ya international temzüng ozüng anema lir.

Hamas-i ashiba agi, parnok aser Palestine nunger temulungpurtem ceasefire tanabuba shilem benoka inyaksü atema renema lir, aser parnok Mladenov aser ken o sensaksemtsürtem nungi official osang tejangja ka atadar.

Mulungnen O



Mrs. Merenjunga Jamir
ASO :31.01.1986
ASÜBA : 23.07.2026

Temeim agi sünger aliba asür **Mrs. Merenjunga Jamir Longsa**, la shirangba mapang nungi akümüli wadang tembangba mapang tashi nung kiyonger, yimtsür yimer, Arogo, yimden yimsüser, kinunger adianu aser medemsor ana aser talang nungi tamang nuktsü, aria bilem den nübo, rongsen aser shisatsü agi ozü tako marok lemsatepogo, nenok ajak dang kanga pelaba lemsateper. Taküm aliba Tsüngremi nenok ajak moajangma agi ozü sarasadem.

Talisa item telok aser nisungtem dang alakteta pelaba lemsateper.

1. Mokochung Town Ao Baptist Arogo
2. Mokochung Town Ao Baptist Arogo (Women Ministry)
3. Mokochung Town Ao Baptist Arogo (Medical Fellowship)
4. Longsa Baptist Arogo
5. Police Baptist Church Dimapur
6. TL Nagamese Baptist Church Dimapur
7. Children Counselling Ministry Dimapur
8. Doctors, Nurses & Staff of Imkongliba Memorial District Hospital Mokochung
9. Doctors, Nurses & Staff of CIHSR Dimapur
10. Doctors, Nurses & Staff of Olive Hospital Dimapur
11. Doctors, Nurses & Staff of Excel Care Hospital Guwahati
12. Doctors, Nurses & Staff of Nikos Hospital Dimapur
13. Doctors, Nurses & Staff of CMC Vellore
14. Mokochung Town Longsa Senso Telongjem
15. Dimapur Longsa Senso Telongjem
16. Dimapur Longsa Fellowship
17. Majakong Ward Yimdden
18. MMC Shop Owner Association
19. GMS Ardang
20. Shri. Metsübo Jamir, Honorable Minister Rural Development, Govt of Nagaland
21. Shri. Robert Longchari, Commissioner & Secretary for the Labour & Employment (SD& E) Govt. of Nagaland
22. Smti. Angelina Tajen, IAS Secretary (AH & VS) Govt. of Nagaland
23. Rev. T. Chuba Jamir, Pastor MTABA
24. Mrs. Shilula APW MTABA
25. Mr & Mrs. Limaküm Longchar, Pastor DABA
26. Rev. John Arul Raj, Chennai
27. Mr. Temjenmoa Jamir
28. Dr. Limasangla Jamir, Nazareth Hospital Shillong
29. Dr. Temsüla Alinger, CIHSR Dimapur
30. Dr. Pradip Kumar Sarma, Apollo Excel Care Guwahati
31. Dr. Mukhtar, Apollo Excel care Guwahati
32. Mr. Lipoktemshi Chaplin CMC Vellore

Temeim Kinungbu, Ojala, Adianu aser Kinungertem.



www.highereducation.nagaland.gov.in

dir.highedu@gmail.com



NO.HED/EXGS/NGESSO/2018/

Kohima, dated the 23rd July, 2026

Nagaland Government Ex-Gratia Scheme for Students Studying Outside Nagaland (NGESSO)

The Department of Higher Education, Nagaland is implementing the Nagaland Government Ex-Gratia Scheme for Students Studying Outside Nagaland (NGESSO) which provides an Ex-Gratia of ? 5 Lakh in the event of any unfortunate deaths of indigenous Naga Students of Nagaland who are studying outside the State in different parts of the country. In order to avail this scheme, students have to register themselves with the Directorate of Higher Education, Nagaland.

For the academic year 2026-2027, Registration Form (Fresh/Renewal) and necessary information are available on the Directorate's Website <https://highereducation.nagaland.gov.in> for download.

Last date for receiving Registration Form: 30th September, 2026.

Sd/-
Director,
Higher Education, Nagaland, Kohima.

36buba August Gold Cup Trophy Tobu nung tenzükogo



Sey-Ong Club mendenbuba K T Lehwang Konyak-i tongti tejaoker L. Shiakpong Konyak nem tetushi agütsüba noksa nung angur.

Dimapur, Luroi/August 4 (TYO): 36buba August Sey-Ong Club Tobu-i ayongzükba Gold Cup Trophy Mongolbar, August 4 nü Mon district kübok Tobu Hq. nung tenzükogo.

Asayamung lapokba sentong nung Ex-minister aser COB NOF Nagaland vice President L Shiakpong Konyak tongti tejaoker liasü.

Sentong nung o jemiba mapang tongti jaokeri iba asayamung ayongzükba aser küm 36 tashi Tobu temeket nung aliba lanurtem nem parnok sempet sayatsü asoshi sabang agütsüba aser saisapong nung career yanglutsü atema maongka agütsüba atema Sey-Ong Club Tobu danga kanga pelar lemsatep.

Lanurtem yongtsü nung yimyayimpong, teamwork aser telongjem adokdaksütsü atema saisapong ya kodang

tongtibang iba indang jembiba mapang Shiakpong-i lanur asayartem dang club-i agütsüba maongka ya agia pei career yanglutsü atema iba asayamung ya maongka tajung ka ama agütsü ajungshi.

Paisa, Tobu temeket nung aliba lenirtem dang saisapong nung lanurtem ajungkettsü atema club den teka amteper inyaksü aser nongita yaritsü ayongzükba liasü.

Sentong nung lokti pela agizükba o jemiba mapang Sey-Ong Club Tobu mendenbuba K T Lehwang Konyak-i, tongti tesemdanger, lenirtem, nüburttem aser asayamung nung shilem agiba team tem pelashishia agizükba liasü.

Paisa, Nagaland Football Association dang parnok tawabang kübok iba asayamung sayatsü aser technical teyari agütsüba atema pelaba lemsatep.

Maneni pai Advisor Youth Resources and Sports, Government of Nagaland, S. Keoshu Yimchunger dang iba asayamung nung amshitsü atema asayadang amshiba osettem agütsüba atema kanga pelaba lemsatep.

Ano pai MLA, Naiba Konyak aser MLA & Chairman SDPDB Tobu, Nyamnye Konyak, na danga club nongita yariba aser mapang shitak nung teyari agütsüba atema pelaba lemsatep.

Asayamung lapokba sentong nung Choosen 3 band-i ken ka aten aser iba sülen tongti tejaokeri ball metsüokja asayamung officially tenzükja liasü.

Sentong nung Administrative officer, tanga sorkar ketdangsürttem aser Tobu temeket nung aliba lenirtem i shilem agi.

World C'ships nung Sindhu seed 9buba, Satwik-Chirag 5buba asütsü



Luroi/August 4, 2026 (Agencies): Taruba BWF World Championships nung PV Sindhu tetsür kija asaya nung seed tekububa aser India nunger tebur tarep asayar Satwiksairaj Rankireddy aser Chirag Shetty na pongububa asütsü.

Iba asayamung ya Indira Gandhi Stadium, New Delhi nung Agust 17 nungi 23 tashi asayatsü.

Sindhu ya reigning Japan Open champion ama aser Satwik o Chirag na ya 2022 Asian Games men's doubles

gold medallists ama iba asayamung nung asayatsü.

India-i World Championships nung category pongu nung asayar mesüra team anana yoktsü, aser category pezü nungbo seeded tarep mesüra asayar kakabosa alitsü.

Parnok den külemi taoba World Championships bronze medallist Lakshya Sen-a tebur kija asaya nung seed 14buba asütsü aser tarep temeyoktep asayar Dhruv Kapila adser Tanisha Crasto na seed 15buba asütsü.

Asayartem ya April 28, 2026 nü sangdongba world rankings dak ajemdaker World Championships atema qualify süogo aser July 28, 2026 rankings dak ajemdaker seedings lemezüktsüogo.

Tebur kija asaya nung world champion Shi Yuqi aser Korea tsür An Se Young na top seed asayar asütsü.

Defending tetsür kija asaya nung world champion Akane Yamaguchi tanabuba aser Wang Zhiyi o Chen Yufei na tasembuba aser pezübuba asütsü.

World Championships atema draw ya Bodhbarnü New Delhi nung asütsü, aser seeded asayar kar danga masayatetsüsa kümra melenshitsü.

Tebur tarep asaya nung Soth Korea nunger tarep Kim Won Ho aser Seo Seung Jae na top seed asütsü aser tetsür tarep asaya nung China tsür Liu Sheng Shu aser Tan Ning na top seed tarep asütsü.

Venus & Serena Williams na Cincinnati Open asayatsü

Luroi/August 4, 2026 (Agencies): Serena aser Venus Williams na Cincinnati Open tetsür tarep asaya nung asayatsü atema wildcard agütsüogo.

Adianuna ya July ita Wimbledon nung tetsür tarep asaya nung külemi asayatsü liasü, saka arishi küm 44 tain Serena ya tetsür kija asaya nung Australia tsür Maya Joint den asayaba mapang temekok yiruba sülen masayatetsüsa aküm.

Iba WTA 1000 asayamung ya Ohio nung August 11 nungi 23 tashi asayatsü aser tena 2022 US Open sülen tang mezüngbuba tarep asaya nung külemi asayatsü lir.

Iba asayamung nung shilem agiba ajanga Serena taküm US Open kija asaya nung asayatsü asoshi lenmang lapoktsütsü akok.

Küm pezü tejakdang la New York kübok Flushing Meadows nung tasembuba round nung tsükba ya la asoshi Grand Slam nung tatembangbuba asaya liasü. Iba sülen la asaya nungi anen saka taküm maneni meyipa arua asaya tenzükogo aser All England Club nung asayaogo.

Lai tang tashi nung Grand Slam kija asaya 24 koka lir, aser Grand Slam timba akokba asayartem rongnung Margaret Court aser Novak Djokovic na dang memenepi lir.

Venus aser Serena Williams na senteper tetsür tarep asaya nung asayamung tongtibang 14 koka lir aser Olympic nunga gold medal asem nguogo.

Arishi küm 46 tain Venus nem Cincinnati nung iba asayamung tetsür kija asaya nung asayatsü atema wildcard ka agütsüogo.

Jordan Henderson Chelsea nung denogo



Luroi/August 4, 2026 (Agencies): Chelsea-i England nunger midfielder Jordan Henderson Hombarnü Brentford nungi alizükogo.

Taoba Liverpool captain, shiba England indang World Cup squad nung densema liasü, pai Stamford Bridge nung küm ana atema tenangzüktepba yangluogo.

Chelsea puri pa alizüktsü tejangraba lir ta osang temai adokba sülen Henderson-i Brentford den tenangzüktepba yanglur aliba thitsüogo ta taoba hopta osang jangjashija liasü.

Arishi küm 36 tain asayar yagi Liverpool nungi asayaba mapang Premier League aser Champions League kokogo. Pa 2023 küm Anfield toktsür Saudi club Al-Ettifaq nung oa aden aser iba sülen ita trok lir Ajax-i ao.

Pa taoba küm Brentford-i meyipa aru aser küm ana atema tenangzüktepba yanglua liasü.

Henderson, shiba England team nungi 91 ben asayaogo, pa England indang 2026 World Cup squad nunga densema liasü, saka minute ishika dang asaya aser asayamung tatemlen teka yirua liasü.

Chelsea-i asayar tejen

Danny Welbeck Brighton nungi alizükba sülen anogo ana lir Henderson Xabi Alonso indang squad nung denogo.

Chelsea puri British-record tasen ka yanglua taoba ita Aston Villa nungi Morgan Rogers pound million 117 entoka alizük aser France defender Maxence Lacroix aser Atalanta defender Marco Palestra nata alizükogo.

Taoba season Chelsea pur Premier League nung 10buba nung tembang aser parnok European football atema qualify mesüteti liasü.

Alonso-i aniba team ya August 24 nü Premier League nung mezüngbuba asaya Craven Cottage nung Fulham den asayatsü.

Kasa mapang nung Spanish striker Gonzalo Garcia-a Real Madrid nungi Fulham nung denogo aser pa coach Alvaro Arbeloa den tanaben longjemogo.

Arishi küm 22 tain asayar yagi Fulham nungi 2031 küm tashi asayatsü atema tenangzüktepba yangluogo.

Spanish media sangdong balala ajanga ashiba agi, pa indang transfer taah ya euro million 40 shi asütsü.

BILEMDANGANG

"Chichiba tembar kati nü tashimait ajak meteta lir saka odang meimer."